

# Wulf Wagers wunderliche Weltbetrachtung

## Wager im freien Fall!

Nochdem i jetzt 23 Jahr verheiratet ben, han i mi scho ganz schön gwundert, dass i letscht Jahr von meira Frau en Gutschei für en Tandem-Fallschirmsprung zu Weihnacht kriagt han. Trotzdem ben i zuversichtlich vorletscht Woch' zu dem angegebena Flugplatz gefahra. No ben i en so en enga Overall ond Gurt neipresst worda, wo mr's d' Schell zwischadenen Gurt rausdruckt hot, wie dene wirtabergische Grafa auf ihre Grabstoei en dr Stuegerter Stiftskirch. Mit ama ganz kloina Fliegerle send mr no auf 4000 Meter Höhe gefloga. Des war so a Fliegerle, wia ma se sonscht bloß en de Nachrichta sieht - teilweise. Sicherheitsanweisunga hots koine gäba. Warum au, mir hend jo Fallschirm drbei g'het. Zu acht



send mr en dem Fliegerle zempresst gwää wia ema Schlachtviehtransporter. Ond 's war obacha warm. Au deshalb, weil mr als Mitsprenger seim Tandem-Master in Löffelchenstellung vor da Bauch bonda wird. Hey, gohts no! Kurz vor's los goht, muaß mr dia verbindende Gurt nomol saumäßig eng a'zieha, was für zwoi normal orientierte Männer a außergewöhnliche Nähe bedeutet. En 4000 Meter Höhe öffnet sich

dia Flugzeugtür. Ond no gilt's 2500 Meter goht's em freien Fall Richtung Boda. Do blöst dr 's d' Backa auf wia em Dissy Gillespie ond dia Mundwinkel begrüßat d' Ohrläppla. Noch etwa 40 Sekunda ziegt dr Master dann da Fallschirm auf. Du hosch des Gefühl, dass de emmer no fälltsch, aber dei Körper a paar Hundert Meter höher hängt. Boah! Die reschtliche Minuta bis zur Landung an i no nemme recht mitkriegt, weil mr sauäßig schlecht worda isch. Aber schee war's auf alle Fäll' ond 's hot mr zoigt, dass mr meh Vertraua in seine Mitmensche han sott. En da Tandem-Master – ond en sei Frau. Bis näggschd Woch' Ihr Wulf Wager